

5. maj 2008

UPA2008/43

**Piginneqatigiilluni inissiat pillugit Inatsisartut peqqussutissaattut nr. xx, xx
2008-meersoq naapertorlugu siunnersuut**

pillugu

Inatsisartut Attaveqarnermut Ineqarnermullu Ataatsimiititaliaata

ISUMALIUTISSIISSUTAA

**Peqqussutissatut siunnersuutip aappassaaneerpeqarnissaanut
saqqummiunneqartoq**

Inatsisartut Attaveqarnermut Ineqarnermullu Ataatsimiititaliaat suliarinninnermini makkuningga inuttaqarpoq:

Inatsisartunut ilaasortaq Jonathan Motzfeldt, Siumut, siulittaasuugallartoq
Inatsisartunut ilaasortaq Vittus Mikaelson, Siumut
Inatsisartunut ilaasortaq Agathe Fontain, Inuit Ataqatigiit
Inatsisartunut ilaasortaq Knud Kristiansen, Atassut
Inatsisartunut ilaasortaq Marie Fleischer, Demokraatit

UPA 2008-mi siullermeerinninnermi peqqussutissatut siunnersuut ataatsimiititaliap misissorpaa makkuninngalu oqaaseqaateqarniarluni.

Siunnersuutip imarisaa

Piginneqatigiilluni inissiat pillugit Inatsisartut peqqussutaata nr. 1-ip, 31. oktober 1991-imeersup ataatsimoortinneqarnissaa nutarterneqarnissaalu peqqussutissatut siunnersuutikkut matumani pineqartukkut pingaarnertut anguniarneqarpoq. Peqqussut maanna atuuttoq 1991-imiilli arlaleriarlugu allanngortinneqartarpoq, aammalu ineqarnermut tunngasuni ineriartornerup pisariaqartitsinerillu suliaasaqarfimmi maleruagassanik tamarmiusunik ataatsimut nutarterinissaq pisariaqalersillugu. Tamanna ataatsimiititaliamit pitsaasutut isigineqarpoq, innuttaasut maleruagassat ataatsimoortinneqarpata ilisimatinneqarsinnaalluaqqullugit. Suliniutit taamaattut innuttaasut inatsiseqarnikkut isumannaatsuunerata annertusarneqarnissaanut naleqquttutut ataatsimiititaliamit isigineqarput. Nammineq pigisatut maannamut inissiat piginneqatigiilluni inissianik

piginneqatigiilluni inissiatillit peqatigiiffiit tigusinissaminnut periarfissaaannik oqilisaataasumik imaluunniit piginneqatigiilluni inissiatillit peqatigiiffiit inissanik maannamut attartortittakkanik nammineq pigisatut inissiatut tunisaqarsinnaanngorlugit allannguisoqartoq ataatsimiititaliap maluginiarpaa. Tamanna tunngavigalugu piginneqatigiilluni inissianik pissarsisoqarsinnaaneranut periarfissat sisamat pilersaarutigineqarput, tamatumani Namminersornerullutik Oqartussat kommunilu tamarmik taarsigassarsisitsinnaallutik. Taamatuttaaq piginneqatigiilluni inissiap aqunneqarneranut ingerlanneqarneranullu maleruagassiisunik pequssutissatut siunnersuut aalajangersakkanik imaqarpoq. Tamanna Inatsisartut kissaatigisaannut naapertuulluarpoq.

Piginneqatigiilluni inissiatillit peqatigiiffiit pisortat taarsigassarsiarititaannut annertussutit siunnersuummi maleruagassiorneqarput. Sanaartornermut aningaasartuutit tamarmiusut 25 %-iilik ernialersugassaanatillu akilersugassaanngitsunik Namminersornerullutik Oqartussat kommunillu tamarmik immikkut siunissami taarsigassarsisitsinnaassapput. Inissiamut 110 kvadratmeterit angullugit angissusilimmut annertunerpaamillu kvadratmeterimut ataatsimut 19.100 kr.-inut taarsigassarsisitsisoqarsinnaavoq. Allannguinerup kingunerisaanik piginneqataasup piginneqataassutai 33 1/3 %-init 50 %-inut annertusissapput. Aaqqissuussinerup kingunerisaanik piginneqatigiilluni inissiamut nammineq akiliutigisassat 7 %-imit 5 %-imut annikillisinneqassapput. Namminersornerullutik Oqartussat kommunillu tamarmik immikkut annertunerpaamik 525.250 kr.-inik suli taarsigassarsisitsisinnaassapput. Taarsigassarsiat agguataarneqarnerata allanngortinneratigut piginneqatigiilluni inissiatillit peqatigiiffiit annertunerusumik akisussaaffilerneqassapput, aningaasalersuinerup annertunerpaataa kreditforeningit aqutigalugit pissammat.

Tusarniaanermi akissutit

Ataatsimiititaliap siunnersuummik matuminnga sularinninnermini atugassaminik tusarniaanermi akissutit nuutinnerannik pissarsiniarsimavoq. Pequssutissat siunnersuut illuatungeriinnut makkununga tusarniaassutigineqarsimasoq ataatsimiititaliap maluginiarpaa: Aningaasaqarnermut Pisortaqaqarfik, Akileraartarnermut Pisortaqaqarfik, Inuussutissarsiornermut Pisortaqaqarfik, A/S Inissiatileqatigiiffik INI, Iserit A/S, KANUKOKA, Sparbank Vest, GrønlandsBanken, Grønlands Ejendoms kontor, Ejendoms kontoret, Igdlo, Kalaallit Nunaanni Sulisitsisut Peqatigiiffiat aammalu Sulisitsisut peqatigiiffii NUSUKA, HST, ILIK, SIK, A-Revision ApS, Pricewaterhouse-Coopers Grønland A/S (Kalaallit Nunaanni kukkuniarsuisoqarfik) aammalu Deloitte.

Tusarniaanermi ukunanit akissutit:

KANUKOKA, A/S Boligselskabet INI, Deloitte, SIK, A-Revision, Grønlands Revisionskontor (oqaasiinnaaq atorlugit tusarniaanermi akissuteqarpoq), GrønlandsBanken, Aningaasaqarnermut Pisortaqaqarfik, NUSUKA, Akileraartarnermut Pisortaqaqarfik, Inuussutissarsiornermut Pisortaqaqarfik, Kalaallit Nunaanni Sulisitsisut Peqatigiiffiat aammalu ILIK.

Tusarniaarnermi illuatungeriit makku siunnersuutip imarisaanut oqaaseqaateqanngillat:

Aningaasaqarnermut Pisortaqaarfik, NUSUKA, Akileraartarnermut Pisortaqaarfik, Inuussutissarsiornermut Pisortaqaarfik, Kalaallit Nunaanni Sulisitsisut Peqatigiiffiat aammalu ILIK.

Illuatungeriinnit tusarniaaffigineqartunit oqaaseqaatit allannguutissatullu siunnersuutit Naalackersuisunit ataatsimut isigalugu ilanngulluarneqarsimmamata ataatsimiititaliamit maluginiarneqarpoq. Tusarniaalluni suliaqarnermi Naalackersuisut peqqissaarsimanerat suliniuteqarsimanerallu nersussallugu ataatsimiititaliap tunngavissaqarsoraa.

Taamaattorli kukkunersuioqarfimmit Deloittemit tusarniaanermi akissut sammilertussallugu ataatsimiititaliap pissutissaqarsoraa.

Deloittepus tusarniaanermi akissummi oqaatigaa siunnersuut matumani pineqartoq aningaasaqarnikkut kinguneqartussaasoq, naak Naalackersuisut akерlianik oqaaseqaraluartut. Naatsorsuinermi assersuutit aqutigalugit piginneqatigiilluni inissiamik pigisaqarnermut peqqussut maanna atuuttoq malillugu inissianut sananeqarnermik kvadratmeterimut 15.000-it 17.204 kr.-it akornanni akeqartunut qaammaatikkuutaartumik akiliut 20 %-it missaannik qaffassasoq Deloittemit missingerneqarpoq. Akerlianik inissianut kvadratmeterimut 19.000 kr.-it sinnerlugit akilerlugit sananeqartunut qaammaatikkuutaartumik akiliutit 20 pct.-it missaannik annikillissaaq. Tusarniaanermi akissut malillugu nalilerneqarpoq tamanna Nuummi piginneqatigiilluni inissiamik pigisaqarneq ataatsimut isigalugu akikinnerulissasoq, tamatumani kvadratmeterimut aki 18.000-it missaanniinnerassanganneqarluni. Akerlianik nalilerneqarpoq sinerissami piginneqatigiilluni inissiamik pisaqarneq akisunerulissasoq, tamatumani kvadratmeterimut aki 15.000 kr.-it missaanniilluni.

Deloittepus nalinginnaasumik assersuusiormigut nalilerpaa peqqussut nutaaq malillugu piginneqatigiilluni inissiaq 105 kvadratmeterinik angissusilik kvadratmeterimut ataatsimut 15.000 kr.-inik akilerlugu sananeqartoq qaammammut 8.200 kr.-inik akilersorneqartariaqartoq. Peqqussummut maanna atuuttumut sanilliullugu tamanna qaammammut 1.500 kr.-it missaannik qaffaaneruvoq. Inissiamut kvadratmeterimut 19.000 kr.-it missaannut sananeqartumut atatillugu 10.000 kr.-it missaannik nalilimmu akiliutaasoq 2.500 kr.-it missaannik appassaaq.

Deloittepus oqaatigaa Nuup avataani piginneqatigiilluni inissianik niuernermik tamanna unittoortitsivissasoq, inuit annertuumik isertitaqartut 10-40-50-imik aqqissuussineq malillugu sanaartornissaat naatsorsuutigineqarsinnaammat aammalu inuit akunnattumik isertitaqartartut piginneqatigiilluni inissialiornissamut akissaqarunnaassanganneqarmata.

Siunnersuummut nalinginnaasumik oqaaseqaatini allassimavoq ajornartorsiut Naalackersuisunit eqqumaffiginiarneqartoq. Taamaalilluni allassimavoq nammineq akiliutigineqartussat apparnerat pissutigalugu aningaaserivinni taarsigassarsianit akisunerusunik pinnani realkreditimit aningaasalersorneqartunik taarsigassarsianut

akilersuutitut piginneqataasut siunissami akikinnerusumik akilersuinissaat naatsorsuutigineqarsinnaammat.

Tamanna innuttaasunut siunissaq isigalugu iluaqutaasussatut immi isigineqarsinnaavoq, piginneqataasooq piginneqataassutiminik kingornagut tunisaqarnermigut naliusunit katersuillunilu sipaaruteqassammat. Piginneqataasut taamaalillutiik inissiaminni naliusumik ullumikkornit annertunerungaartumik sipaaruteqarnissartik naatsorsuutigissavaat.

Erseqqissaatigissallugu pingaaruteqarpoq peqqussutip akuersissutigineqarnerata kingorna inissianut nutaanut sananeqartunut allaannguutit taakku kisimik atuutissammata. Taamaalilluni piginneqatigiilluni inissianut sananeqareersimasunut aammalu piginneqatigiilluni inissiaatillit peqatigiiffiit pisortanit taarsigassarsianik neriorsorneqareersimasunut peqqussut sunniuteqassanngilaq.

Deloitte uparuartugai ataatsimiititaliamit maluginiarneqarput, nalunngilluarluguli Deloitte siunnersuutai saqqummiunneqartut eqqutissagaluarpata ajornartorsiutaasinnaasut tamakku aqqiinniarlugit siunnersuummik saqqummiussinissaminnut Naalakkersuisut tunuarsimaarnaviannngitsut. Inuit akunnattumik isertitallit nunap ilaani sanaartornermi akit appasiffiusuni najugallit inissianik imminnut piviusorsiortumik imminnut pilersorsinnaajuarnissaat naalakkeruinermik aqutsinermikkut Naalakkersuisunit pingaartinneqarmat ataatsimiititaliamit isumaqatigineqarpoq.

Deloittemit allanillu tusarniaanermi akissutit isumaliutissiissummut **ilanngussatut** ilanngunneqarput.

Peqqussutissatut siunnersuutip aqqissuinikkut misissorneqarnera

Ataatsimiititaliami suliarinninnermut atatillugu siunnersuut aqqissuinikkut- aningaasaqarnikkut misissoqqullugu Naalakkersuisut qinnuigisimavai. Taamatut misissuineq ulloq 22. april 2008-mi pivoq. Misissuineq tamanna ataatsimiititaliamit assorsuaq iluaqutaasutut isigineqarpoq qujassutigalugulu.

Aqqissuinikkut misissuinerminni Naalakkersuisut erseqqissaatigaat piginneqatigiilluni inissianik sanaartornermut akit realkreditimit aningaasalersorneqartut annertusineqarnissaat peqqussummi anguniarneqartoq. Tamanna nunatsinni inissianik niuernermi realkreditimit aningaasalersuutit annikillisinneqarnissaat eqqarsaatigalugu 10/40/50-imik aqqissuussineq iluatsilluarsimasooq isigissagaanni.

Naalakkersuisut misissuinerminni kisitsisit takussutissiallu arlallit saqqummiuppaat, taakku peqqussutissap nutaap kingunerisassaasa ersersinneqarnerannut piukkunnaatilittut isigineqarlutik. Ajornartorsiutit Deloittemit saqqummiunneqartut toqqaannartumik pinaveersimatinnianngikkaluarlugit, Deloitte tusarniaanermi akissutaa malillugu misissuinikkut qulaajarneqarpoq siunissaq ungasinnerusooq isigalugu aningaasaqarnikkut iluaqutissat peqqussutikkut nalimmassarneqassapput.

Iluautissanut taakkununga pingaartumik ilaavoq peqqussummut maanna atuuttumut sanilliullugu inissianut sipaarutit annertusinerat aammalu nammineq akiliutissat annikillinerat.

Ataatsimiititaliap isumaliutai

Siunnersuut siullermeerneqarmat siunnersuummi siunertarineqarut piviusunnngortinneqarnissaat ataatsimut isigalugu partiinit tapersersorneqartoq ataatsimiititaliamit maluginiarneqarpoq.

Peqqussutissat siunnersuummi piginneqataasut sanaartornermut namminneq akiliutaasa 5 %-inut appartinneqarnerannik kiisalu Namminersornerullutik Oqartussat kommunillu tamarmik immikkut aningaasalersuinerata 25 %-imik appartinneqarnerannik maleruagassanik aalajangersaasunik Naalakkersuisut atuutsitsilernerat siumut isiginnilluarnertut ataatsimiititaliamit isigineqarpoq. Pisortat aningaasalersuinerisa appartinneqarnerat ataatsimiititaliamit ima paasineqarpoq kreditforeningip nunatsinni inissianik niuernermit suli – annertunerusumillu – aningaasalersuerususuteqartutut Naalakkersuisunit isigineqartut.

Inissiamit attartortakkamiit piginneqatigiilluni inissiatileqatigiinnut taassumalu kingorna piginneqatigiilluni inissiatileqatigiiffik atorunnaarteriarlugu inissiatut nammineq pigisatut allannngortitsinissaq siunertaralugu siunnersuummi aningaasatigut atortoqanngitsoq Ataatsimiititaliap eqqumaffigaa. Inissiat attartortakkat inissisimanertik paarilluagaanertilluunniit pissutigalugu pilerinartutut tunineqarpata, pisortat teknikkikkut aningaasatigullu akigititaasigut aningaasanik inissiat taama ittut annaasaqaatigisinnaavaat. Taamaattumik inissianik pilerinartunik attartortut iluanaarniarnissaminnut ilusaatigut periarfissaqarsinnaapput. Ataatsimiititalialli naliliineratigut naluneqanngimmat nunatsinni inissiat amerlanerpaat aserfallatsaalineqannginneri iluanaarutiginiarneqarsinnaanngimmata Ataatsimiititaliap suliama matumani annertunerusumik iliuuseqalersaanngilaq.

Taamatuttaaq ataatsimiititaliap naammagisimaarlugu maluginiarpaa attartortut inissiaminnik attartukkaminnik piginneqatigiilluni inissianngortitsinissaminnik kissaateqanngitsunik peqqussutissatut siunnersuutikkut naleqquttumik naammaginartumillu ikinnerussuteqarnikkut illersorneqarnerat Naalakkersuisunit qulakkeerneqarmat. Aammattaaq peqqussutissatut siunnersuummi siunnersuutigineqarpoq entreprenuri namminersortoq piginneqatigiilluni inissianik nutaanik sanaartorsinnaasoq, tamatumalu kingorna tunisaqarnermigut sanaartussanik nutaanik taakkuninnga piginneqatigiilluni inissiatillit peqatigiiffiitut tunniusisinnaasoq. Kommunit Naalakkersuisullu sanaartortitsisutut inissisimanissaminnut peqqussutissatut siunnersuutikkut periarfissinneqarmata ataatsimiititaliap maluginiarpaa. Suliniutit taamaattut ataatsimiititaliamit tapersersorneqarput.

Piginneqatigiilluni inissialiortiternermut peqataarusulersinneqarnissaat taamaallillunilu nunatsinni inissiamik pilersuinerup annertusarneqarnissaa

siunertaralugit sanaartortitsisut namminersortut aaqqissuussineq iluaqtissaqartutut isigissagaat ataatsimiititaliap neriutigaa.

Piginneqatigiilluni ineqarnermut tunngasuni maannamut ineriartornermut ikorfartuutaallunilu nukittorsaasutut siunnersuut ataatsimiititaliamit isigineqarpoq.

Siunnersuummik aappaassaaneerinninnermi oqaaseqaateqarfigeqquneqartunik ataasiakkaanik immikkut Naalakkersuisut oqaaseqaateqaqussallugit **Inuit Ataqatigiinnit** ilaasortaaitap tunngavissaqarsora.

§ 12 malillugu piumasaqaataavoq kommunalbestyrelsi taarsigassarsisitsinissamik neriorsuuteqassasoq. Siunertamut aningaasanik naammattunik kommunit ataasiakkaat ilaat peqanngippata susoqassava? Peqatigiiffinnut taarsigassarsisitseqqinnissaminut Namminersornerullutik Oqartussat piumappat?

Aaqqissuussineq nutaaq pisoqarluunniit Tuapannguani sanaartukkamut atornerqarniarnersoq kiisalu attartuusimasunut attartortinniarlugit piginneqataassutit ilaannik Namminersornerullutik Oqartussat pigisaqarnialersaernerut paasissutissiissutigeqquneqarpoq. Matumani pingaartumik pissakinnerusut, soorlu angajoqqaat kisermaat utoqqalinersiutillillu eqqarsaatigineqarput.

Ataatsimiititaliap inassutaa

Siuliani oqaatigineqartut paaseqqullugit siunnersuut **akuersissutigineqassasoq ataatsimiititaliamit isumaqatigiittumit** inassutigineqarpoq.

Taama oqaaseqarluni siunnersuut Inatsisartunut ataatsimiititaliap matumuuna aappassaaniigassanngortippaa.

Jonathan Motzfeldt,
Siulittaasuugallartoq

Knud Kristiansen

Vittus Mikaelson

Marie Fleischer

Agathe Fontain